

Carnascèr fascian

La neva publicazion de l'Istitut Ladin "Carnascèr Fascian. Un rito tradizionale nella modernità" vegnarà prejentèda en domenìa ai 27 de firé a Cianacei con i gropes de la Mèscres de la Val de Sora

Publicazions - L'Istitut Cultural Ladin "majon di fascegn" viventea l'rich panoram editorièl dedicà a la tradizions populères con n nef liber che documentea la beleza e la magia del Carnascèr de Fascia. N Carnascèr semper vif e ferùscol, che moscia amò l'energia de chest rituèl veior fat de colores, ac, vic e madalenzes, che segna l trapas anter l'invern e l'aisciuda.

N "viac per retrac", chel de Giulio Malfer, travers i colores sgalizenc del Carnascèr de Fascia vedù te sia esprescions da anchecondi, compagna – desche introduzion – da n "viac te la memoria" olache l'antropologh Cesare Poppi ne conta la ventures de n revival che a peèr via dai egn '80 à vedù renascer na tradizion che someèa destinèda a jir dò ju senza remiscion: na usanza che de n vers à reijes fones te la storia de la comunanza, e che da l'auter à daite na vitalità nia da creer e semper orida al mudament. Retrac dynamics, "moec", desche la recordanzes che ge va dò a chi mudaments tel temp e tel spazie.

Da Penia a Cianacei, da Ciampedel a Soraga, enfin ja Moena, se pel recognoscer la forza de n rituèl veior che anchecondi doventa adertura simbol de na neva identità: no bele scempia rievocazion del temp passà, metuda en mostra per deletèr i ghesc, ma moment de agregazion sozièla, esprescion de n besegn fon, identità chierida, rencurèda, vivuda en comunanza te n prozess de renovament semper gaèrt che mena noscia jent ti tempes deribolenc da anchecondi.

N auter liber frut del lurier de documentazion, de studie, de enrescida che l'Istitut Cultural Ladin ge sporc a sia jent per capir miec la reijes e la formes de nosc patrimonie tradizionèl tel chèder de la cultura de la veia Europa; ma ence lurier de valorisazion, out a ge dèr luster a tenc elemenc de la cultura populèra, da spes trac endò e ence desprijé vèlch outa, dai paladins de l'omologazion.

A la prejentazion, en domenìa ai 27 de firé da les 18.00 te Teater Marmolèda de Cianacei, tolarà pèrt ence l Grop de la Mèscres de Dèlba e Penia, l Grop de la Mèscres de Cianacei e l Grop de la Mèscres de Ciampedel. N event rich de color, storia e tradizion endrezà col didament de l'Azienda de Promozion Turistica de la Val de Fascia e del Comun de Cianacei da no perder per cognoscer più davejin la val e sia tradizions. (ar)



La soracuerta del nef liber sul carnascèr dat for a da l'Istitut Cultural Ladin.